

Kenneth Croes preparando pa su Hazaña

ORANJESTAD (APA) Durante e fin di siman aki un biaha mas lo ta na Aruba e ultra atleta Kenneth Croes. Esaki en preparacion pa su hazaña di dia 28 di augustus proximo landando di Aruba pa Venezuela.

Diadomingo awor Kenneth Croes como parti di su entrenamiento pa su hazaña Aruba-Venezuela, lo landa for di Colony te un poco prome cu Punta Bravo ... Pues e lo yega te na Tamarijn Beach Hotel na unda e lo ser spera pa pueblo di Aruba y hubentud enespecial. Ta trata aki di un distancia di mas o menos 24 kilometer. Durante e trayecto aki e lo wordu acompaña pa yate, divers, etc. E lo bai hanja asistencia tecnico di Maiktio Croes y e evento aki lo wordu transmiti vivo y directo for di ariba laman y tambe na salida y yegada na Tamarijn, cual lo ta mas o menos 3.30 di atardi padilanti, pa Radio Carina FM. Esaki tambe ta un di e eventonan cu Kenneth Croes ta realisá den cuadro di su campaña anti-droga y pa promove practica di deporte y atletismo, serca e hubentud Arubano.

Kenneth Croes lo sali for di Colony pa 9'or di mainta y tur hende ta keda invita pa acompaña Kenneth Croes durante e trayecto cu e tin pensa pa landa of por speré na e punto unda e lo termina, esta na Tamarijn Beach Hotel.